

欽定舊唐書

卷八
之十

舊唐書卷八

後晉司空同中書門下平章事劉 昫撰

本紀第八

玄宗上

玄宗至道大聖大明孝皇帝諱隆基睿宗第三子也母
曰昭成順聖皇后竇氏垂拱元年秋八月戊寅生於東
都性英斷多藝尤知音律善八分書儀範偉麗有非常
之表三年閏七月丁卯封楚王天授三年十月戊戌出
閣開府置官屬年始七歲朔望車騎至朝堂金吾將軍
武懿宗忌上嚴整訶排儀仗因欲折之上叱之曰吾家

朝堂干汝何事敢迫吾騎從則天聞而特加寵異之尋却入閣長壽二年臘月丁卯改封臨淄郡王聖曆元年出閣賜第於東都積善坊大足元年從幸西京賜宅於興慶坊長安中歷右衛郎將尚輦奉御神龍元年遷衛尉少卿景龍二年四月兼潞州別駕十二月加銀青光祿大夫州境有黃龍白日昇天嘗出畋有紫雲在其上後從者望而得之前後符瑞凡一十九事四年中宗將祀南郊來朝京師將行使術士韓禮筮之著一莖孑然獨立禮驚曰著立奇瑞非常也不可言屬中宗末年王室多故上常陰引材力之士以自助上所居宅外有水

池浸溢頃餘望氣者以爲龍氣四年四月中宗幸其第
因遊其池結綵爲樓船令巨象踏之至六月中宗暴崩
韋后臨朝稱制韋溫宗楚客紀處訥等謀傾宗社以睿
宗介弟之重先謀不利道士馮道力處士劉承祖皆善
於占兆詣上布誠款上所居里名隆慶時人語訛以隆
爲龍韋庶人稱制改元又爲唐隆皆符御名上益自負
乃與太平公主謀之公主喜以子崇簡從上乃與崇簡
朝邑尉劉幽求長上折衝麻嗣宗押萬騎果毅葛福順
李仙鳧寶昌寺僧普潤等定策誅之或曰先啓大王上
曰我拯社稷之危赴君父之急事成福歸於宗社不成

身死於忠孝安可先請憂怖大王乎若請而從是王與危事請而不從則吾計失矣遂以庚子夜率幽求等數十人自苑南入總監鍾紹京又率丁匠百餘以從分遣萬騎往玄武門殺羽林將軍韋播高嵩持首而至衆歡叫大集攻白獸立德等門斬關而進左萬騎自左入右萬騎自右入合於凌煙閣前時太極殿前有宿梓宮萬騎聞譟聲皆披甲應之韋庶人惶惑走入飛騎營爲亂兵所害於是分遣誅韋氏之黨比明內外討捕皆斬之乃比謁睿宗謝不先啓請之罪睿宗遽前抱上而泣曰宗社禍難由汝安定神祇萬姓賴汝之力也拜殿中監

同中書門下三品兼押左右萬騎進封平王睿宗卽位
與侍臣議立皇太子僉曰除天下之禍者享天下之福
拯天下之危者受天下之安平王有聖德定天下又聞
成器已下咸有推讓宜膺主鬯以副羣心睿宗從之丙
午制曰舜去四凶而功格天地武有七德而戡定黎人
故知有大勳者必受神明之福仗高義者必爲七鬯之
主朕恭臨寶位亭育寰區以萬物之心爲心以兆人之
命爲命雖承繼之道咸以冢嫡居尊而無私之懷必推
功業爲首然後可保安社稷永奉宗祧第三子平王基
孝而克忠義而能勇比以朕居藩邸虔守國彝貴戚中

人都無引接羣邪害正兇黨實繁利口巧言讒說罔極
韋溫延秀朋黨競起晉卿楚客交構其間潛結回邪排
擠端善潛貯兵甲將害朕躬基密聞其期先難奮發推
身鞠弭衆應如歸呼吸之間凶渠殄滅安七廟於幾墜
拯羣臣於將殞方舜之功過四比武之德逾七靈祇望
在昆弟樂推一人元良萬邦以定爲副君者非此而誰
可立爲皇太子有司擇日備禮冊命七月己巳睿宗御
承天門皇太子詣朝堂受冊是日有景雲之瑞改元爲
景雲大赦天下二月又制曰惟天生烝人牧以元后維
皇立國副以儲君將以保綏家邦安固後嗣者也朕纂

承洪業欽奉寶圖夜分不寢日昃忘倦茫茫四海懼一人之未周烝烝萬姓恐一物之失所雖卿士竭誠守宰宣化緬懷庶域仍未小康是以求下人之變風遵先朝之故事皇太子基仁孝因心溫恭成德深達禮體能辨皇猷宜令監國俾爾爲政其六品已下除授及徒罪已下並取基處分延和元年六月兇黨因術人聞睿宗曰據立象帝座及前星有灾皇太子合作天子不合更居東宮矣睿宗曰傳德避灾吾意決矣七月壬午制曰朕以寡昧虔奉鴻休本殊王季之賢早達延陵之節昔在聖曆已讓皇嗣之尊爰暨神龍終辭太弟之授豈唯衣

冠所覩抑亦兆庶咸知頃屬國步不夷時艱主幼大業
有綴旒之懼寶位深墜地之憂議迫公卿遂司契篆日
愼一日以至於今一紀之勞勤亦至矣萬方之俗化漸
行矣將成宿願脫屣寰區昔堯之禪舜唯能是與禹以
命啓匪私其親神器之重允歸公授皇太子基有大功
於天地定阡危於社稷溫文旣習聖敬克躋委之監國
已移歲年時政益明庶工惟序朕之知子庶不負時曆
數在躬宜陟元后可令卽皇帝位有司擇日授冊朕方
比迹洪古希風太皇神與化遊思與道合無爲無事豈
不美歟王公百寮宜識朕意上意惶懼馳見叩頭請所

以傳位之旨睿宗曰吾因汝功業得宗社今帝座有眚思欲遜避唯聖德大勳始轉禍爲福易位於汝吾知晚矣上始居武德殿視事三品以下除授及徒罪皆自決之先天二年七月三日尚書左僕射竇懷貞侍中岑羲中書令蕭至忠崔湜雍州長史李晉左羽林大將軍常元楷右羽林將軍李慈等與太平公主同謀期以其月四日以羽林軍作亂上密知之因以中旨告岐王範薛王業兵部尚書郭元振將軍王毛仲取閑廐馬及家人三百餘人率太僕少卿李令問王守一內侍高力士果毅李守德等親信十數人出武德殿入虔化門梟常元

楷李慈於北闕擒賈膺福李猷於內客省以出執蕭至忠岑羲於朝皆斬之睿宗明日下詔曰朕將高居無爲自今軍國政刑一事已上並取皇帝處分上御承天門樓下制曰朕承累聖之洪休荷重光之積慶昔因多難內屬構屯寶位深墜地之憂神器有綴旒之懼事殷家國義感神祇吟嘯風雲龔行雷電致君親於堯舜濟黔首於休和遂以孟秋允昇儲貳旋承內禪繼體宸居拜首之請空勤讓立之誠莫展恭臨億兆二載于茲上稟聖謨下凝庶績八荒同軌瀛海無波不謂姦慝潛謀蕭牆竊發逆賊竇懷貞等並以庸妄權齒朝廷毫髮之効

未申丘山之釁仍積共成梟獍將肆姦回太上皇聖斷
宏通英謀獨運命朕率岐王範薛王業等躬事誅鋤齊
斧一麾凶渠盡殪太陽朗耀澄氛靄於天衢高風順時
厲肅殺於秋序神靈協贊夷夏相歡四族之慝旣清七
日之祥方永爰承後命載闡休期總軍國之大猷施雲
雨之鴻澤承乾之道旣光被於無垠作解之恩思式覃
於品物當與億兆同此惟新可大赦天下大辟罪已下
咸赦除之加邠王守禮實封三百戶宋王成器申王成
義各加實封一千戶岐王範薛王業各加實封七百戶
文武官三品已下賜爵一級四品已下各加一階內外

官人被諸道按察使及御史所摘伏咸宜洗滌選日依次叙用丁卯崔湜盧藏用除名長流嶺表壬申王琚爲銀青光祿大夫工部尚書封趙國公實封三百戶姜皎銀青光祿大夫工部尚書封楚國公實封五百戶李令問銀青光祿大夫殿中監實封三百戶王毛仲輔國大將軍左武衛大將軍檢校內外閑廐兼知監牧使霍國公實封五百戶王守一銀青光祿大夫太常卿同正員進封晉國公實封五百戶並賞其定策功琚皎令問固讓癸丑中書侍郎陸象先爲益州大都督府長史兼劔南道按察兵馬使尚書左丞張說爲檢校中書令甲戌

令毀天樞取其銅鐵充軍國雜用庚辰王琚爲中書侍郎加實封二百戶姜皎殿中監仍克內外閑廐使加實封二百戶李令問殿中少監知尚食事加實封二百戶已丑周孝明高皇帝依舊追贈太原王宜去帝號孝明皇后宜稱太原王妃昊陵順陵並稱太原王及妃墓八月壬辰封州流人劉幽求爲尚書左僕射知軍國重事徐國公仍依舊實封七百戶制曰凡有刑人國家常法掩骼埋胔王者用心自今已後輒有屠割刑人骨肉者依法科殘害之罪九月司空兼揚州大都督宋王成器爲太尉兼揚州大都督益州大都督兼右金吾大將軍

申王成義爲司徒兼益州大都督單于大都護兼左金
吾大將軍邠王守禮爲司空癸丑封華嶽神爲金天王
九月丁卯宋王成器爲開府儀同三司尚書左僕射劉
幽求同中書門下三品檢校中書令燕國公張說爲中
書令特進王仁皎爲開府儀同三司己卯宴王公百寮
於承天門令左右於樓下撒金錢許中書門下五品已
上官及諸司三品已上官爭拾之仍賜物有差郭元振
兼御史大夫丙戌又置右御史臺冬十一月甲申幸新
豐之溫湯癸卯講武於驪山兵部尚書代國公郭元振
坐虧失軍容配流新州給事中攝太常少卿唐紹以軍

禮有失斬於纛下甲辰畋獵於渭川同州刺史梁國公姚元之爲兵部尚書同中書門下三品乙巳至自溫湯十一月乙丑幽求兼知侍中戊子上加尊號爲開元神武皇帝十二月庚寅朔大赦天下改元爲開元内外官賜勲一轉改尚書左右僕射爲左右丞相中書省爲紫微省門下省爲黃門省侍中爲監雍州爲京兆府洛州爲河南府長史爲少尹國初以來宰相及食實封功臣子孫一應沈翳未承恩者令量才擢用開元元年十二月己亥禁斷潑寒胡戲癸丑尚書左丞相兼黃門監劉幽求爲太子少保罷知政事紫微令張說爲相州刺史

甲寅門下侍郎盧懷慎同紫微黃門平章事

二年春正月關中自去秋至于是月不雨人多饑乏遣使賑給制求直諫言弘益政理者名山大川並令祈祭丙寅紫微令姚崇上言請檢責天下僧尼以偽濫還俗者二萬餘人甲申并州大都督府長史兼檢校左衛大將軍薛訥同紫微黃門三品仍總兵以討奚契丹二月突厥默啜遣其子同俄特勒率衆寇北庭都護府右驍衛將軍郭虔瓘擊敗之斬同俄於城下己酉以旱親錄囚徒改太史監罷隸秘書省閏月癸亥令道士女冠僧尼致拜父母丁卯復置十道按察使己未突厥默啜妹